

[Augsburg], 30. März 1561

An Johannes Oporinus

UB Basel, Fr. Gr. I 11, fol. 243r.

Steinmann Nr. 733.

Druck: Gilly, Manuskripte S. 64 (Auszug).

Lit.: Husner S. 156; Steinmann S. 79.

S. P. D. Tabulam Cebetis pictam accepi, expressae maculaturam maluissem, sed et haec grata est. Si quid missurus es, Erhardus Hillerus libenter opinor ad me perferet. Librum Arriani 2. et 3. iam emendatum et descriptum ad te mitterem, nisi τῷ ὑπογράμματεῖ diffiderem, cuius ἀπόγραφον nondum relegi. Quartum etiam hac ipsa hebdomade, ἀν θεὸς ἐθέλῃ absoluam, quod ob ferias plusculum studiosi ocij spero. Si aliter non potero, mittam Argentoratum, et Gregoram non negligam quantum in me erit. Tres tomos dum excudis, primus magna ex parte distractus erit. Quaeso statim domum reuersus, inchoato. Tantum alacritatis mihi addes, vt inuitis morbis valiturus, inuitis parcis victurus mihi esse videar, et inuitis negocijs ocium impetraturus absoluendi et limandi nugas meas. Vale πολυχρύσως. Die palmarum 1561.

Hiero[nymus] Wolfius  
Tuus.

Simplicij opus, si voles, graecum etiam ad te mittam. Arriano tuo vtare licebit, qui non incorrectus est. Mendas a me sublatas facilius ex annotationibus meis quam ex codice meo corriges. Idem et de Simplicio sentio, quorum vereor ne liturae meae correctorem fallant. Legi saepius, et aliàs aliud (vt fit) in deprauatis aut suspectis locis in mentem venit. ἐγώ δὲ ἀφειδῶς χρῶμαι τῷ καλάμῳ. Sed tamen absente me hoc remedij erit, vt annotationes meae cum ipsis libri folijs conferantur. Si aliud exemplum nancisci licuisset: facile te isto ac libenter quidem labore subleuassem.

D. Ioannem Fuggerum adj: benignè respondit: spero praeter spem, te vnà cum Arriani tribus reliquis libris Gregoram quoque a Prechteris accepturum. D. Ioanni G[eorgio] Bomgartnero literas Postelli reddidi. Is libellum de quo scribit Postellus, se accepisse negat, nec ego illum vidi. Iterum ac feliciss[ime] et diutiss[ime] vale καὶ εὐτύχει Mi D. Oporine. Postello rescribam aliàs. Cos. noster Hainzelius te salutat.